


www.BibleForChildren.org



Kadadiam 3



Adam ussangai bainena Hawa aka la
mendadi indona ma'hupatau.




Ingganna olo'-olo' malaiha napadadi
Puang Allataala DEBATAnta yabo
galantangam ula'um handam manahhu'
mantipu. Indo ula' mekutana lako indo
baine naua: «Tappa' si'da haka
nalahangkoa' Puang Allataala muande
ingganna bua kaju illaam inde bela?»»




Natimba'im indo
baine naua:

<<Ingganna bua kaju
illaam inde bela' mala
asam kiande, sulibanna indo bua kaju
illaam inde tängäna bela' aka naua Puang
Allataala: <Tä' si'da-si'da mala uhhaka'
dapaka ia la muande
buana, aka maka'
muande la
matekoa'.> >>



Iya nauam indo
ula': <<Setonganna
tä'koa' la mate.

Sapo' ia hi tia anna
nauai Puang Allataala, aka maka'
muandea', la tibukka pikkihammua' anna
la susikoa' Puang Allataala la muissam
usse' la kamapiaam anna
kakadakeam.>>




Tappana naita indo baine bua kaju ia
too tä' si' da deem pada samapia, la
mammi' diande, anna la umpatibukka
pikkiham, iya naponge' siaham indo
bua kaju dipelahangam anna naandei.
Puhai naande, iya
nabeemmi duka'
muanena naande.



Puhanna naande tappa tibukka
siaham pikkihanna anna naissammi
pole' naua: <<Ma'kambelä haki' kita
päläe'!>> Iya mualam daunna kaju ara
anna napasiampim-ampinni
nasapu'iam kalena.





Sapo' natambai
Puang Allataala DEBATAnta
indo muane naua: <<O Adam, umbako
ngei?>>





Natimba'im

Adam naua: <<Kuhingginna
pentekkamu illaam inde bela', iya le'ba' siahamä'
membuni mahea' aka kuissammi kuua ma'kambelä
hä' kao päläe'.>>





Iya ma'kadam Puang Allataala naua:

<<Menna umpaissanniko anna muissanni muua:


<Ma'kambelää'?> Muande haka iko indo bua kaju
kupelahangam la diande?>>



Natimba'im Adam naua: <<Indo baine umpadioannä'
ampe'ku, iam too umbeennä' indo bua kaju anna
kuandei.>> Iya mekutanam Puang
Allataala DEBATAnta lako indo baine
naua: <<Akanna umpateenni?>>
Mentimba'um indo baine naua:
<<Aka natipuä' indo ula' nasuhum
kuande indo bua kaju.>>



Nasuhum nasua lao Puang Allataala
DEBATAnta indo hupatau umpellei
bela' Eden anna unghähäi indo
litä' naongei buttu.





Puhai nasua
lao Puang Allataala

indo hupatau, iya ussuam sanaka-naka
kerub tohho dio indo ba'bana bela'
Eden, tandai mata allo, sola
pa'dam ma'nala-nala tiputa'
lelem lao pali'.
Muampai indo
lalam lako too'
kaju mepatubo.




Iya solam metindo Adam anna Hawa baina lambi' kebättä Hawa sampe undadiam mesa muane. Iya ma'kadam Hawa naua: <<Pa'kamasenam too DEBATA nasuhum malaä' undadiam mesa muane.>> Iam too anna nasangaim Kain.




Mane undadium polei mesa muane, nasangai ia Habel.
Tappana kasalle indo dua änä'na, iya si ma'kambi' ia
Habel anna si mengkähä litä' ia Kain.



Pissam wattu muala sabaheam bua pengkähäna indo
Kain, anna napehumalasanni längäm DEBATA. Naala
duka' Habel sanaka-naka uhu äinä' na
dombana, natunu, anna naala
asanni lompona napehumalasam.




Lambi' tä' deem pada sanapohäe DEBATA Habel sola
bua pemala'na. Sapo' Kain ia sola bua pemala'na tä'
napohäe DEBATA. Tä' deem pada
sameali-ali Kain anna hosso
penabanna.



Iya ma'kadam Kain lako adinna naua: <<Habel, talao lako bela'.>> Sulei lako bela'na, tappa uhhopäi Habel adinna napatei.




Iya ma'kadam DEBATA lako Kain naua: «Umba ngei Habel adimmu?» Natimba' Kain naua: «Tä' kuissam. Aka kao haka too kao si unjagai?» Iya le'ba'um Kain umpellei DEBATA lu dekke tandai mata allona Eden anna tohhoi dio Nod.





Iya sola oom metindo Adam anna Hawa lambi undadium pole oom mesa muane. Iya nasangaim ia Set, aka naua Hawa: <<Nabala' iannä' Puang Allataala indo kakanna isanga Habel aka puha napatei Kain.>>



Puhai undadium Set, tubopi kahua hatu' taunna Adam
anna undadium polepi sanaka-naka änä', muane anna
baine. Ia ham mane matei kaseha hatu'
tallu pulo taunna.



Tappana naita DEBATA tuttuam kadäkke'
gau'na hupatau lako lino anna ingganna
pattuju penabanna kadake liu, iya
menassammi DEBATA anna mapi
'di' penabanna aka puham
untampa hupatau
illaam inde lino.




Iam too anna nauam: <<La kutallanni asam
ingganna indo puha kupadadi inde lino
susi hupatau susi olo'-olo' manahanna
anna malaihanna sola olo'-olo'
tissollo'na anna ingganna dassi
yabo lawwa, aka
menassannä'



kela tä'
oha
kupadadi.>>




Sapo' tä' ia la ditallanni Nuh aka angga ham ia
umpomasannam penabanna DEBATA. Indem ia
tulasanna Nuh: Deem tallu änä' na Nuh
isanga Sem, Ham, anna Yafet.




Indo Nuh mesa to malolo gau' anna anggam ia tä'
deem sassainna illaam lino indo wattu eta too.
Aka Nuh ia silombum liu Puang Allataala
anna natuhu'i pa'elo'na.





2



60



Kadadiam 3 - 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot; Tammy S.

Bambam Bible (ptu) © 2022, Wycliffe Bible Translators,
Inc. All rights reserved.

<https://live.bible.is/bible/PTULAI/GEN/1>

©2026 Bible for Children, Inc.

www.M1914.org

www.bibleforchildren.org

